

Ün concert surprendent

Albin Brun e Patricia Draeger han concertà in dumengia passada illa Baselgia San Lurench a Sent. Ün concert cun gronda variaziun e cun ritmica zaclignusa.

BENEDICT STECHER/FMR

La baselgia San Lurench a Sent es cuntschainta per sia bun'acustica e vain lodada da musicistas e musicists. Quai es eir il motiv cha blers chi han fingià concertà a Sent tuornan adüna darcheu a giodair l'atmosfera unica. Uschè eir *Patricia Draeger* ed *Albin Brun*: «Eu n'ha concertà fingià diversas jadas qua a Sent cun differentas fuormaziuns ed hoz cun Patricia.»

Ün concert varià

Al concert a Sent ha Patricia Draeger sunà l'orgel da man cun büttels e Brun l'orgelin da Sviz. Per dar al concert da dumengia passada daplü variaziun ha Albin Brun sunà eir ün pèr tocs cul saxofon in tenor, quai chi ha pisserà per üna taimpra musicala diversa. El ha eir fat ün grond cumpliment a *Regula Ursprung* chi organisescha ils concerts per la Socie-



Il duo Patricia Draeger ed Albin Brun in plaina concentraziun a Sent. FOTO BENEDICT STECHER

tà d'Ütil public da Sent e dit ch'ella fetscha quai fich bain ed in möd na cumplichà. «Al concert dad hoz sunain nus be

aignas cumposiziuns chi sun nadas per part eir in quista regiun», ha dit Albin Brun. Üna da quellas es dedichada al pla-

net Saturn ed ha nom perquai «sa turne». Il concert da dumengia passada a Sent es stat fich varià ed ils duos orgels han manà illa baselgia üna misculanza cun dumondas e respostas, melanconicas e melodiusas.

Sper divers tocs scrits dad Albin Brun hana sunà eir oters da Patricia Draeger. Ella ha fat vacanzas i'l Tessin per scriver ün per tocs novs. Il problem d'eira quel ch'ün cuc chantaiva tuottadi e disturbaiva la concentraziun – e perquai es nat il toc «cucu» ch'els han sunà in dumengia a Sent.

A chasa cul «bus da cultura»

Ils respunsabels dal concert vaivan organisà ün «bus da cultura» per manar a chasa las auditoras ed audituors. «Quai es üna sporta cha nus lessan introduier e mantgnair ün temp per verer lura, scha quella es tscherchada», ha dit Regula Ursprung.

Ils duos musicists

Patricia Draeger da Zug ha fat ils stüdis in Svizra ed in Ollanda cun ün diplom da concerts. Sco acordeonista es ella statta manadra pro diversas produziuns da teater. Actualmaing suna ella culla fuormaziun Ala Fekra Project, cun *Corin Curschellas* ed eir sco duo cun *Sergej Simbriev*. Patricia Draeger es docenta per acordeon a la Scoul'ota per musica a Lucerna.

Albin Brun ha scrit bleras cumposiziuns per teaters, per films e gös auditivs. El ha concertà cun diversas fuormaziuns a festivals in Europa, Asia ed Africa. Albin Brun ha survgni il Premi da cultura da la cità da Lucerna dal 2013 ed il Premi da musica svizzer dal 2017. El instruischa saxofon a Lucerna.